

INSAM lo haya un director nobo

# Awor cu Jos Mud su contrato ta terminando

Deseo ta p'e centro aki bira un Centro pa tratamiento di Cancer

MINISTER di Salubridad Publico, Richard Visser a confirma cu e contrato cu INSAM tin cu Jos Mud, kende tabata Director na AZV, bao di e Gobierno anterior di MEP, pero a ser busca pa haci un reorganizacion di INSAM, pa cual su contrato ta finalizando.

Nan tin un candidato caba, pero no ta oportuno pa menciona nomber ainda, segun Minister Richard Visser. Riba e pregunta si e conocido pediatra, dr. Reinhardt lo por bira e proximo Director, e mandatario a bisa cu su nomber ta un di e candidatonan cu a solicita.

Di otro banda den e dianan aki ta na Aruba, e team di Baptist Hospital, kendenan kier mas informacion, prome di dicidi di tuma maneho di e centro aki over y converti'e den un hospital.

Di acuerdo cu e MOU entre Gobierno y Baptist, pa 16 di augustus awor mester tin claridad si nan ta bin maneha INSAM of kico mas pa haci pa interesa e grupo aki pa maneha INSAM. Pesey tin negociacion ta tumando lugar ainda. Si no logra acorda algo, anto lo bay p'a Plan B. unda un grupo di Hulanda ta interesa, segun Minister Visser.

Prome cu dia 16 di augustus awor, Gobierno mester por sa ki direccion lo bay cu e proyecto aki, maske tin indicacion caba, den ki direccion mester hiba INSAM.

INSAM sigur lo no bira un Hospital, maske e ta haciendo hopi trabao di un hospital, pero deseo di e Gobierno aki ta pa converti INSAM den un Centro pa Trata Cancer (Oncologie) na Aruba, pero cual mester di cooperacion di Bonaire y Corsou.

Pero ta pushando Baptist tambe, pa traha riba un estudio di viabilidad completo p'e bira un centro di cancer completo.